

- प्रधानमंत्री नरेन्द्र मोदी बिहार सारू चालीस हजार करोड़ रुपया ऊं बत्ता खर्च वाळी विकास री केई परियोजनावां रो उद्घाटन कीनो अर नुवा कामां री नींव रखी।
- केन्द्रीय सामाजिक न्याय अर अधिकारिता राज्य मंत्री रामदास अठावले कह्यो—सरकार सगळा तबकां रो विकास करणो तैय कीनो।
- विश्व लोकतंत्र दिवस रे मौके राज्यपाल हरिभाऊ बागडे कह्यो— लोकतंत्र री मजबूती सारू सगळां ने मिल र काम करणो व्हेला।
- राज्य सरकार 222 आरएएस अहलकारां रा तबादला कीना।

000

प्रधानमंत्री नरेन्द्र मोदी आज बिहार सारू पूर्णिया जिला ऊं चालीस हजार करोड़ रुपया ऊं बत्ता खर्च वाळी विकास री न्यारी-न्यारी परियोजनावां रो उद्घाटन कीनो अर नुवा कामां री नींव रखी। आं मांय नुवो बणायी ज्यो पूर्णिया हवाई अड्डो अर वठे ऊं उड़ानां सारू व्हेवणो ई शामिल है। श्री मोदी बिहार मांय राष्ट्रीय मखाना बोर्ड री ई सुरूआत कीनी। वे भागलपुर रा पीरपैती मांय 2 हजार 400 मेगावाट री ताप विद्युत परियोजना रा काम री नींव रखी। प्रधानमंत्री कोसी-मेची अंतर-राज्यीय नदी लिंक परियोजना रा पहला दौर रा काम री नींव ई रखी। वे बिक्रमशिला अर कटारिया बीचे रेलवे लेण बिछावण रो काम ई सुरू कीनो। श्री मोदी सीमांचल रा अररिया अर किशनगंज जिलां ने जोड़बा वाळी रेलवे लेण रो ई उद्घाटन कीनो। ई मौके राख्यी ज्यी जनसभा मांय प्रधानमंत्री कह्यो के डबल इंजन सरकार बिहार रा लोगां री जिन्दगी आसाण बणावण सारू लगातार काम कर रही है।

000

केन्द्रीय सामाजिक न्याय अर अधिकारिता राज्य मंत्री रामदास अठावले कह्यो है के सरकार समाज रा सगळा तबकां रो विकास करण अर सगळां ने न्याय देवणो तैय कीनो है। वे आज जयपुर मांय प्रदेश रा सामाजिक न्याय अर अधिकारिता मंत्री अविनाश गहलोत सागे महकमा रा अहलकारां सागे राख्यी ज्यी मीटिंग मांय बोल रहया हा। अठावले कह्यो के देश मांय प्रधानमंत्री जनधन योजना रा तैत 56 करोड़ ऊं बत्ता खाता खोली ज्यो है, ज्यां मांय राजस्थान रा पौने चार करोड़ खाता शामिल है। वे कह्यो के प्रधानमंत्री मुद्रा योजना रा तैत ई राजस्थान मांय दो करोड़ 34 लाख ऊं बत्ता लोगां ने फायदो दियो ज्यो है। केन्द्रीय मंत्री कह्यो के सरकार कानी ऊं पिछाडी तबका री जनता रा भला सारू चलाया जा रहया कार्यकमां रो फायदो समाज रा आखिरी छोर री जनता ताई पूगणो चाहिजे। श्री अठावले मीटिंग मांय महकमा कानी ऊं चलायी जा रही न्यारी-न्यारी योजनावां रा काम रो जायजो लीनो। ई पाछे खबरनवीसां सागे बातचीत करता थकां वे भारत अर पाकिस्तान बीचे क्रिकेट मैच री विपख कानी ऊं आलोचना करण ने बेबुनियाद बताता थकां कह्यो के खेल मांय सियासत नी व्हेवणी चाहिजे।

केन्द्रीय मंत्री कह्यो के विपख कने कोई मुद्दो नी है, ई कारण वो बेकार मसलां ने मुद्दा बणावण री कोशिश करे है।

000

प्रदेश मांय सुरक्षित सड़क मार्ग अभियान —सुसमा ने जन अभियान रा तौर ऊं चलायो जावेला। उपमुख्यमंत्री दिया कुमारी आज जयपुर मांय अभियान रा समापन समारोह मांय बोल रही ही। वे कह्यो के सगळा सांसदां अर विधायकां ऊं सुरक्षित सड़क मार्ग अभियान ने वां रा सोशल मीडिया प्लेटफॉर्म रे मार्फत साझा करण री अपील करी जावेला। दिया कुमारी कह्यो के यातायात नियमां री पालना नी करण वाळां ने रोकण अर समझावण री

जिम्मेदारी हर एक जणा री है। उपमुख्यमंत्री सड़कां माथे हिफाजत सारू जनता ऊं जागरुकता अभियान मांय बढ़-चढ़ र शामिल व्हेवण सारू कह्यो।

000

ध्यान जोग है के सुसमा अभियान रे दौरान प्रदेश रा 1 हजार 97 संस्थानां मांय 4 लाख 18 हजार ऊं बत्ता विद्यार्थियां मांय सड़कां माथे हिफाजत रा बारा मांय जाग जगायी ज्यी। इण मांय करौली अव्वल रह्यो, जद के सीकर दूजा अर डूंगरपुर तीजा पायदान माथे रह्यो।

000

सुप्रीम कोर्ट वक्फ कानून माथे रोक लगावण ऊं नट ग्यो है, हालांकि अदालत वक्फ संशोधन कानून 2025 रा कुछ प्रावधानां माथे रोक लगा दीनी है। किंण ई ने वां री संपत्ति वक्फ रा तौर ऊं देवण ऊं पैली पांच साल ताई मुस्लिम धर्म री पालना करण री जरूरत वाळा खण्ड माथे रोक लगा दीरीजी है। मुख्य न्यायाधीश न्यायमूर्ति बी.आर. गवई अर न्यायमूर्ति ऑगस्टिन जॉर्ज मसीह री पीठ कह्यो के ओ खण्ड राज्य सरकारां कानी ऊं इण ऊं जुड़ी शर्ता तैय करण सारू नियम बणावण ताई निलंबित रेहवेला। पीठ कह्यो के पूरा कानून माथे रोक लगावण रो कोई मामलो नी बणे है।

अल्पसंख्यक मामलात मंत्री किरेन रिजिजू अदालत रा फैसला रो स्वागत करता थकां मुम्बई मांय कह्यो के ई कानून ऊं गरीब तबका रा मुसलमान अर महिलावां समेत पूरा समुदाय ने फायदो मिलेला। श्री रिजिजू बतायो के सरकार ई बिल ऊं जुड़ी सगळी जाणकारियां अर तर्क अदालत सामी पेश कीना।

000

मुख्य सचिव सुधांश पंत आवता साल करायी जावण वाळी जनगणना सारू टेमसर प्रशासनिक इकाइयां बणावणो तैय करण रा हुकम दीना है। श्री पंत जनगणना-2027 री तैयारियां रो जायजो लेवण सारू आज राज्य स्तर री समन्वय समिति री मीटिंग मां बोल रह्या हा। वे बतायो के आ जनगणना पूरी तरह डिजिटल व्हेला, जिण ऊं तहसील अर गाँव रा लेवल माथे सटीक जाणकारी भेळी करी जा सकेला। मुख्य सचिव प्रशासनिक सरहदां मांय बदलाव ई साल 31 दिसम्बर ताई ई करण रा हुकम दीना। वे बतायो के मार्च 2027 ताई वां मांय कोई बदलाव नी कर्यो जा सकेला।

000

राज्यपाल हरिभाऊ बागडे कह्यो है के लोकतंत्र री मजबूती सारू सगळा ने मिल र काम करणो व्हेला। वे कह्यो के भारत रो संविधान सब ऊं ऊंचो है, जिण मांय दुनिया रा बेहतरीन सिद्धान्तां ने शामिल करी ज्या है। श्री बागडे आज विश्व लोकतंत्र दिवस रे मौके जयपुर मांय राख्यी ज्या भारतीय युवा संसद अधिवेशन मांय बोल रह्या हा। राज्यपाल कह्यो के नौजवान देश रा कर्णधार है ज्यां ने “देश प्रथम” री सोच सागे काम करण री सीख देवणी चाहिजे। श्री बागडे कह्यो के भणार्ई-लिखाई रे मार्फत नौजवानां री बुद्धि अर शरीर री ताकत बधा र लोकतंत्र ने मजबूत बनायो जा सके है। कार्यक्रम मांय राज्यपाल लोकतंत्र वैचारिकी पोथी रो विमोचन ई कीनो।

000

मुख्यमंत्री भजनलाल शर्मा कह्यो है के सरकार रो मकसद जनता ने तेजी ऊं साता देता थकां योजनावां रो फायदो आखिरी छोर री जनता ताई पूगावणो है। वे आज जयपुर मांय जनसुणवाई रे दौरान बोल रह्या हा। मुख्यमंत्री कह्यो के साफगोई सागे जवाबदेह तंत्र ऊं जनता री जिन्दगी मांय सकारात्मक बदलाव आ रह्यो है। श्री शर्मा महिलावां, बुजुर्ग अर दिव्यांगजन री समस्यावां सुणी अर अहलकारां ने बेगा निपटारा रा हुकम दीना।

000

सरकार 222 आरएस अहलकारां रा तबादला कर दीना है, जद के 13 अहलकारां ने और जिम्मेदारी दीरीजी है। मोहन दान रतनू ने मुख्यमंत्री रा विशेषाधिकारी बनायी ज्या है। अशोक कुमार योगी ने वन अर पर्यावरण राज्य मंत्री रा विशिष्ट सहायक, दिनेश कुमार जांगीड़ ने पशुपालन विभाग अर असलम शेर खान ने अल्पसंख्यक मामलात विभाग मांय संयुक्त सचिव बनायी ज्या है। नरेंद्र कुमार बंसल ने जयपुर ग्रेटर नगर निगम मांय अतिरिक्त

आयुक्त अर आनंदीलाल वैष्णव ने गृह विभाग मांय संयुक्त शासन सचिव री जिम्मेदारी दीरीजी है। केई ए.डी.एम. अर एस.डी.एम. री ई बदली करीजी है।

000

जीएसटी परिषद् कानी ऊं करी ज्या कर सुधारां ऊं स्वास्थ्य सेवा हलका मांय ई जनता ने खूब साता मिलेला। परिषद् आयुर्वेद, यूनानी अर होम्योपैथी रा ईलाज री न्यारी-न्यारी दवाइयां माथे जी.एस.टी. री रेट 12 फीसदी ऊं घटा र 5 फीसदी कर दीनी है। ई सागे ई ईलाज, दांतां रा ईलाज अर ढांढां-ढोरां रा ईलाज ऊं जुड़्या साज-ओ-सामान माथे जीएसटी री रेट 18 ऊं घटा र 5 फीसदी कर दीरीजी है। ई रे अलावा, मेडिकल ग्रेड ऑक्सीजन माथे ई टैक्स री रेट कम करीजी है। दवाइयां माथे जीएसटी कम व्हेवण ऊं अस्पतालां माथे कम व्हेवण रा आसार है, जिण ऊं मरीजां, खासकर कम आमदनी वाला पिरवारां ने फायदो मिलेला।

000

प्रदेश मांय चौमासा री बिरखा कम पड़ गयी है। प्रदेश रा आतूणी हलका मांय सरहद कने री ठोड़ां चौमासा री बिरखा बंद व्हे गयी है। मौसम विभाग रे मुजब लगातार बाज रह्या उतराद-आतूणी बायरा ऊं चौमासा री बिरखा बंद व्हेवण लागी है। मौसम सूखो रेहवण ऊं पारो ई ओजू चढ़बा लाग्यो है। ई बीचे लारला चौबीस घंटा मांय सवाईमाधोपुर, टोंक, जयपुर अर दौसा जिलां मांय हल्की बरसात व्ही। जयपुर रा केई हलकां मांय छांटो-छिड़को व्ह्यो। महकमा काल ताई मौसम सूखो रेहवण रा आसार जताया है। मौसम केन्द्र जयपुर रा निदेशक राधेश्याम शर्मा बतायो के 18 सितम्बर ऊं कोटा, उदयपुर अर भरतपुर संभाग मांय कठे-कठे हल्की ऊं मझला दर्जा री बरसात रा आसार है।

000